

# **Ҳазрати Абу Бакр (1-қисм)**

16:38 / 21.04.2017 9137

## **СОЛИХ САЛАФЛАР ИБРАТИ**

### **САҲОБАЛАР САЙИДИ**

**Абу Бакр Сиддиқ розияллоҳу анҳу ҳаётларидан лавҳалар**

Муаллиф: Аҳмад МУҲАММАД ТУРСУН

**Ислом.уз сайтиning муҳтарам муҳлислари! Исломда шахсни улуғлаш рағбатлантирилмаса-да, аммо Пайғамбаримиз Муҳаммад алайҳиссаломнинг содик саҳобалари, улардан кейин ўтган тобеъинлар ва табаъ тобеъинлардан иборат солиҳ салафларнинг ҳаёт йўли, ахлоқи, фазилатлари қиёматгача бутун Ислом уммати учун улкан ибрат, ўрганишга муносиб таълим ва сабоқ бўлиб қолаверади. Ана шуни назарда тутиб, бугундан бошлаб солиҳ салафларнинг ҳаётларидан ибратли воқеаларни, ўрганишга арзирли ривоятларни сиз, азизларга тақдим этиб боришни лозим кўрдик. Ушбу ривоятларни муаллиф Аҳмад Муҳаммад Ислом.уз сайти муҳлислари учун маҳсус тақдим қилди.**

## **АСҲОБНИНГ ПЕШВОСИ**

(1-қисм)

**Бисмиллаҳир роҳманир роҳийм.**

Ҳазрат Абу Бакр Сиддиқ розияллоҳу анҳу Маккадаги Қурайш қабиласининг Тамим уруғидан эдилар. Қурайшийлар орасида обрўлари баланд, ҳамма у кишини севар, гапларига қулоқ солар, ҳукмларига бўйсунар эди. Оталари Усмон Абу Кухофа Макка фатҳи куни мусулмон бўлганди, ўғилларидан бир йил кейин, хижрий 14 йили тўқсон етти ёшида вафот этган. Онлари Уммул Хайр лақабли аёл бўлган. Абу Бакрнинг ҳам ота, ҳам она томонидан сулолалари Муррада Пайғамбар алайҳиссалом сулолаларига бирлашади.

Абу Бакр Сиддиқ Сарвари коинот соллаллоҳу алайҳи васалламдан икки ёш кичик эдилар, у зотдан кейин икки йил яшадилар. Расули акрам

соллаллоҳу алайҳи васаллам каби олтмиш уч ёшларида, ҳижрий 13 (милодий 634) йили вафот этдилар. Насаб илмининг билимдони эдилар. Жоҳилият даврида қон даъвоси тортишувларида ҳакамлик қилганлар. Бирор марта бутга сиғинмаганлар, ичкилиқни оғизлариға олмаганлар, бузук йўлга юрмаганлар.

Газлама тижорати билан шуғулланиб, жуда бойиб кетган эдилар. Исломга кирган вақтларида қирқ минг дирҳам сармоялари бўлган. Нубуватдан олдин Пайғамбар алайҳиссалом ҳам савдогар бўлганлари учун ана шу даврда икковлари дўстлашишган. Абу Бакр ҳазрат Расулуллоҳ соллаллоҳу алайҳи васалламга энг оғир дамларида ҳамдам, мададкор, ёрдамчи, содик дўст бўлдилар. Бойликларининг катга қисмини Аллоҳ ризолиги йўлида Унинг дини равнақи учун сарфладилар.

Ҳазрат Абу Бакрнинг исмлари Абдуллоҳ бўлган, бу исмни у кишига Расули акрам соллаллоҳу алайҳи васаллам бергандилар. Илк фарзандлариға нисбат берилиб Абу Бакр, деб аталадиган бўлдилар ва шу ном билан Ислом тарихида машҳур бўлдилар. Ислом динини ҳеч тараддуғусиз қабул қилганлари, Расулуллоҳ соллаллоҳу алайҳи васалламнинг меърожларини эшитган заҳотилари тасдиқлаганлари учун Сиддик унвони ила шарафландилар. Қизлари ҳазрат Оишани Сарвари коинотга никоҳлаб бериб, Набий алайҳиссаломга ақробалик ришталари ила ҳам боғланган эдилар.

Расулуллоҳ соллаллоҳу алайҳи васаллам вафотларидан сўнг Ислом бирлигининг парчаланишига йўл қўймадилар, ўзлари мусулмонларнинг ilk халифаси этиб сайландилар. Ислом давлати буҳронли кунларни бошдан кечираётган бир пайтда сохта пайғамбарларга қарши, Исломга нисбатан хуружлар ва диндан чиқишлиарга қарши аёвсиз кураш очдилар. Бу зотнинг даврларида Эрон, Ироқ, Сурия фатҳ этилиб, Ислом давлати чегаралари янада кенгайди. Ажнодинда Рум салтанатининг юз минглик қўшини тор-мор қилинди.

Ҳазрат Абу Бакр халифаликлари даврида Қуръони карим оятларини биринчи бўлиб тўплатганлари учун «Жомиъул-Қуръон» деган шарафли номга сазовор бўлдилар.

Абу Бакр биринчи марта қурилган давлатни исломий сиёsat ила юрғиздилар, Қуръонни «Асосий қонун» ўлароқ тадбиқ этдилар. Ҳамма ишда адолатни биринчи ўринга қўйдилар.

Абу Бакр Сиддиқ ҳамиша Расууллоҳ соллаллоҳу алайҳи васаллам билан ёнма-ён бўлдилар, ҳар ишда у зотга ёрдамга ошиқдилар. Бир туюга минганиш Мадинаға ҳижрат қилдилар. Барча ғазотларда Фахри коинот соллаллоҳу алайҳи васаллам билан қатнашдилар. Ҳатгоқи, у зот хасталикларида Пайғамбаримиз соллаллоҳу алайҳи васалламнинг ўринлариға ўн етти вақт намозга имомлик қилганлар. Ҳазрат Мұхаммад соллаллоҳу алайҳи васалламдан сўнг «Собиқуни Ислом», деб аталган маккалик илк саккиз мусулмоннинг биринчиси эдилар. Ҳаётлик ҷоғларидаёқ жаннатга киришлари ўзлариға муждаланган ўн саҳобий (Ашараи мубашшара)нинг ҳам, тўғри йўлдаги тўрт улуғ халифа (хулафои рошидин)нинг ҳам биринчиси бўлдилар. Ҳамиша Расууллоҳ соллаллоҳу алайҳи васалламнинг ёнларида эдилар, у зотга вазирлик қилдилар. Жаноб Сарвари коинот соллаллоҳу алайҳи васаллам асҳоб билан истишора ҷоғида Абу Бакрни ўнг томонлариға, ҳазрат Умарни чап томонлариға олиб, уларнинг фикру-раъйларини сўрардилар. Ҳазрат Абу Бакр Сиддиқ розияллоҳу анҳу Расууллоҳ соллаллоҳу алайҳи васалламдан 142 та ҳадис ривоят қилганлар.

Ҳазрат Абу Бакр розияллоҳу анҳу Қуръон ошиғи эдилар. Хуш овозда Қуръон тиловат қилар эканлар, ўзлари тинмай йиғлардилар. Асҳобнинг энг билимдони, ҳалоли, ишончлиси, оққўнгили эдилар. Намозни ниҳоятда хушуъ ва хузуъ билан ўқирдилар. Бошқаларга ёрдам беришдан завқланардилар. Исломнинг илк кунида етти қулни, жумладан, Билол Ҳабашийни сотиб олиб озод қилганлари тарихда ёзилган.

Ниҳоятда оддий ҳаёт кечирганлар. Ҳалифаликлари ҷоғида Байтулмолдан (давлат хазинасидан) ўзлариға ажратилган икки дирҳам (кумуш пул) миқдоридаги маош билан кун кечирганлар. Вафот этганларида на уйларидан, на ёnlаридан ҳеч пул чиқмаган.

Бугунги ҳикоямиз ана шу улуғ зот, саҳобийларнинг саййиди, Исломнинг биринчи халифаси Абу Бакр Сиддиқ ҳақларидадир. Аллоҳ бу зотдан рози бўлсин!